



Broj/Број: 01,02-50-1-18-8/08
Sarajevo/Сарајево, 23.4.2008. godine

Z A P I S N I K

8. zajedničke sjednice oba doma Parlamentarne skupštine BiH, održane 23.4.2008., s početkom u 10,10 sati

Prisutni članovi Parlamentarne skupštine BiH: 39 poslanika iz Predstavničkog doma i 13 delegata iz Doma naroda Parlamentarne skupštine BiH.

Opravdano odsutni poslanici iz Predstavničkog doma: Sadik Bahtić, Rifat Dolić i Jovan Todorović.

Opravdano odsutni delegati iz Doma naroda: Sulejman Tihic i Hilmo Neimarlija.

Prisutni članovi Vijeća ministara BiH: Nikola Špirić, predsjedavajući Vijeća ministara BiH, Tarik Sadović, ministar sigurnosti BiH, Dragan Vrankić, ministar finansija i trezora BiH, Bariša Čolak, ministar pravde BiH, Slobodan Puhalac, ministar vanjske trgovine i ekonomskih odnosa BiH, Sredoje Nović, ministar civilnih poslova BiH, Sven Alkalaj, ministar vanjskih poslova BiH, Božo Ljubić, ministar komunikacija i prometa BiH, Igor Cmadak, zamjenik ministra odbrane BiH, Fuad Kasumović, zamjenik ministra finansija i trezora BiH, Srđan Arnaut, zamjenik ministra pravde BiH, Mijo Krešić, zamjenik ministra sigurnosti BiH.

Ostali prisutni: Nikola Deretić, predsjednik Upravnog odbora Javnog RTV servisa BiH, Mehmed Agović, generalni direktor BHRT-a, predstavnici međunarodnih organizacija u Bosni i Hercegovini – OHR-a, OSCE-a, EUSR-a, DFID-a i predstavnici nevladinih organizacija CCI-a i NDI-a.

Sjednicu je otvorio i njome predsjedavao Mladen Ivanić, prvi zamjenik predsjedavajućeg Doma naroda Parlamentarne skupštine BiH.

U uvodnom izlaganju Mladen Ivanić upoznao je prisutne o tome da je zajednička sjednica oba doma Parlamentarne skupštine BiH sazvana na inicijativu Predstavničkog doma, te da je Zajednički kolegij oba doma Parlamentarne skupštine BiH, osim prihvatanja ove inicijative, odlučio da se na istoj sjednici raspravlja i o DKP mreži Bosne i Hercegovine.

Istakao je da je Zajednički kolegij oba doma Parlamentarne skupštine BiH, u skladu s članom 88. Poslovnika Doma naroda i i članom 95. Poslovnika Predstavničkog doma, utvrdio sljedeći

D N E V N I R E D

1. Poslovanje Javnog RTV servisa BiH i mjere za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu, i
2. Informacija o stanju u DKP mreži Bosne i Hercegovine.

Mladen Ivanić posebno je podsjetio na odredbe člana 88. stav (1) Poslovnika Doma naroda i člana 95. stav (1) Poslovnika Predstavničkog doma u kojima je utvrđeno da "dnevni red zajedničke sjednice oba doma utvrđuje Zajednički kolegij", te da je shodno tim odredbama dnevni red utvrđen i o njemu se ne vodi rasprava.

Upoznao je prisutne o tome da su poslanici Jerko Ivanković Lijanović i Jozo Križanović podnijeli prijedlog za dopunu dnevnog reda, ali je Zajednički kolegij oba doma Parlamentarne skupštine BiH ostao pri utvrđenom dnevnom redu i uputio poslanike da svoje inicijative podnesu na redovnoj sjednici Predstavničkog doma.

O dnevnom redu diskutirali su:

- **Jozo Križanović**, koji je iznio mišljenje da je problematično tumačenje poslovnika da za zajedničke sjednice oba doma dnevni red utvrđuje Zajednički kolegij oba doma Parlamentarne skupštine BiH, a ne da se on utvrđuje na sjednici;
- **Mladen Ivanić**, koji je ponovio da je Zajednički kolegij oba doma Parlamentarne skupštine BiH konsenzusom utvrdio dnevni red;
- **Jerko Ivanković Lijanović**, koji je istakao važnost da se o Zakonu o zaštiti domaće proizvodnje raspravlja na zajedničkoj sjednici oba doma Parlamentarne skupštine BiH;
- **Šefik Džaferović**, koji je iznio primjedbu na naziv prve tačke dnevnog reda koja bi trebalo da glasi: Poslovanje Javnog RTV sistema BiH a ne: Poslovanje Javnog RTV servisa, te je predložio da se rasprava ne vodi o "servisu" već o "sistemu", jer sistem čine tri subjekta a ne samo državni RTV servis;
- **Zlatko Lagumdžija**, koji je zatražio da se poslanicima i delegatima podijeli prijedlog dopune dnevnog reda poslanika Jose Križanović ujedno iznoseći mišljenje da su predsjedavajući Vijeća ministara BiH i ministar vanjskih poslova BiH na zajedničkoj sjednici oba doma Parlamentarne skupštine BiH, u okviru druge tačke dnevnog reda, trebali iznijeti određeni ekspozice u kojem bi javnost obavijestili o stanju u DKP mreži Bosne i Hercegovine, a o čemu su i članovi Zajedničkog kolegija oba doma Parlamentarne skupštine BiH trebali voditi računa. Također, naglasio je da će u okviru druge tačke dnevnog reda diskutirati o potpisivanju, odnosno nepotpisivanju Sporazuma o stabilizaciji i pridruživanju;
- **Momčilo Novaković**, koji je iznio poslovničku intervenciju da poslanici u smislu člana 65. Poslovnika Predstavničkog doma predlažu naziv nove tačke dnevnog reda, a ne iznose mišljenja o čemu će raspravljati u okviru već predloženih tačaka dnevnog reda.

Nakon navedenih izlaganja Mladen Ivanić zaključio je raspravu o dnevnom redu uz ponovljenu konstataciju da je Zajednički kolegij oba doma Parlamentarne skupštine BiH utvrdio dnevni red u skladu s poslovničkim odredbama, te napomenu da prihvata sugestiju Šefika Džaferovića da se prva tačka dnevnog reda odnosi na RTV sistem a ne RTV servis.

Prije početka rasprave po utvrđenim tačkama dnevnog reda, Mladen Ivanić podsjetio je prisutne da će svaki poslanik i delegat imati pravo na tri replike po jednoj tački dnevnog reda u trajanju od tri minute.

Ad. 1. Poslovanje Javnog RTV servisa BiH i mjere za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu

U uvodnim napomenama Mladen Ivanić konstatirao je da su u pozivu za sjednicu navedeni materijali koji su osnova za raspravu o ovoj tački dnevnog reda. Osim materijala navedenih u pozivu, poslanicima i delegatima dostavljen je i dopunjeni dio Plana sanacionih mjera, koji je BHRT dostavio 21. aprila 2008. Naglasio je da je povod za raspravu na zajedničkoj sjednici oba doma Izvještaj Ureda za reviziju institucija BiH o reviziji Javnog RTV servisa BiH za 2005. i 2006. godinu.

Nakon ovih uvodnih napomena, Mladen Ivanić i Milorad Živković kratko su upoznali prisutne sa stavovima Doma naroda i Predstavničkog doma povodom razmatranja Izvještaja o reviziji finansijskog poslovanja Javnog RTV servisa BiH za 2005. i 2006. godinu.

Mladen Ivanić je, s obzirom da je prijedlog za raspravu o ovoj tački dnevnog reda podnijela Komisija za saobraćaj i komunikacije Predstavničkog doma, pozvao poslanika Branka Dokića, predsjedavajućeg Komisije, da prije otvaranja rasprave, u ime Komisije, obrazloži ovu tačku dnevnog reda.

Branko Dokić je najprije podsjetio prisutne da je predmet rasprave Javni RTV servis u skladu s članom 29. Zakona o Javnom sistemu BiH, a da se sistem ne može zaobići samo u onom dijelu u kojem on utiče ili je uticao na poslovanje RTV servisa BiH i koji utiče na prevazilaženje trenutnog stanja. Upoznao je prisutne da je Komisija za komunikacije i saobraćaj Predstavničkog doma o pitanju poslovanja RTV servisa i načinu prevazilaženja postojećeg stanja održala šest sastanka na koje su pozivani predsjednik Upravnog odbora, te sadašnji i bivši generalni direktor Javnog RTV servisa BiH.

Naglašavajući značaj rasprave o pitanju Javnog RTV servisa BiH na posebnoj sjednici Parlamentarne skupštine BiH, Branko Dokić kratko je prezentirao i hronologiju dešavanja u Parlamentarnoj skupštini BiH u vezi s revizorskim i izvještajima o poslovanju Javnog RTV servisa BiH.

U raspravi o ovoj tački dnevnog reda učestvovali su: Slavko Jovičić, Šefik Džaferović Milica Marković; Savo Erić, Dušanka Majkić, Husein Nanić, Beriz Belkić, Ilija Filipović, Adem Ibrahimpašić, Jerko Ivanković Lijanović, Momčilo Novaković, Božo Rajić, Salko Sokolović, Jozo Križanović, Mehmed Suljkanović, Mirko Okolić, Branko Dokić, Alma Čolo, Šemsudin Mehmedović, Slobodan Šaraba, Bakir Izetbegović, Velimir Jukić, Zlatko Lagumdžija, Denis Bećirović, Martin Raguž, Niko Lozančić, Zoran Koprivica i Drago Ljubičić.

Rasprava o ovoj tački dnevnog reda imala je sljedeći tok:

- **Slavko Jovičić** na početku izlaganja zatražio je da mu se dostavi spisak zaposlenih po nacionalnoj strukturi u BHT 1 i BH Radiju 1, te spisak ličnih primanja članova Upravnog odbora, rukovodstva i novinara zaposlenih na Javnom RTV servisu BiH. Nakon izlaganja, Slavko Jovičić predložio je sljedeći

ZAKLJUČAK

"Predstavnički dom zadužuje UO i menadžment RTV BHT 1 da se, u skladu s konstitutivnošću naroda i ravnopravnosti Srba, Hrvata, Bošnjaka i ostalih u BiH, što prije ispoštuje balans u nacionalnoj strukturi zaposlenih u ovom javnom (državnom) emiteru."

Nakon izlaganja Slavka Jovičića korekciju citata (repliku) imali su: Jozo Križanović, koji je istakao da bi bilo korisno čuti uvodno izlaganje predstavnika Upravnog odbora ili menadžmenta Javnog RTV servisa BiH, imajući u vidu da je predmet rasprave u okviru ove tačke dnevnog reda osam različitih izvještaja; Sefer Halilović, koji je, također, zatražio obraćanje predstavnika Upravnog odbora i menadžmenta Javnog RTV servisa BiH gospode Deretića i Agovića; Dušanka Majkić, koja je istakla da su članovi Upravnog odbora i menadžmenta Javnog RTV servisa BiH kroz materijale koje su dostavili rekli sve, pa njihovo saslušanje na početku rasprave nije neophodno, osim ako bude potrebe za određenim pojašnjenjima.

Poslovničku intervenciju imale su Azra Hadžiahmetović i Alma Čolo koje su sugerirale da se rasprava ne vodi o materijalima o kojima su nadležne komisije i domovi Parlamentarne skupštine BiH već raspravljali, već da se usmjeri na materijale koji nisu razmatrani a odnose se na plan konsolidacije za prevazilaženje stanja.

Mladen Ivanić upoznao je pristupne da su s predstavnicima BHRT-a izvršene konsultacije u vezi s obraćanjem Parlamentarnoj skupštini BiH, te je dogovoreno da njihovo obraćanje uslijedi nakon iznošenja primjedbi i sugestija članova Parlamentarne skupštine BiH

- **Šefik Džaferović** u uvodnom izlaganju pojasnio je zašto se tačka dnevnog reda odnosi na "sistem" a ne na "servis" ističući da Javni RTV sistem BiH, pored Javnog RTV servisa BiH, ima još tri subjekta i to RTV Federacije BiH, RTV Republike Srpske i korporaciju, kao četvrti pravni subjekat koji nije osnovan a bez kojeg Javni RTV sistem BiH ne može funkcionirati. Govoreći o značaju državne televizije, istakao je da Parlamentarna skupština BiH mora odobriti i određena budžetska sredstva za konsolidaciju ove televizije. Također, upoznao je prisutne o problemu finansiranja satelitskog programa državne televizije, te je s tim u vezi zatražio od predsjedavajućeg Vijeća ministara BiH da pojasni zbog čega nije donesena odluka o kontribuciji ili učešću države u plaćanju servisa.

Nakon izlaganja Šefika Džaferovića korekciju citata (repliku) imali su: Snježana Rajilić, Ekrem Ajanović, Husein Nanić, Milica Marković, Branko Dokić, Šemsudin Mehmedović, Šefik Džaferović, Alma Čolo, Adem Ibrahimpašić, Milorad Živković, Beriz Belkić, Selim Bešliagić.

- **Milica Marković** istakla je da ni Parlamentarna skupština BiH ni Vijeće ministara BiH nisu uticali na uređivačku politiku, menadžment, pa prema tome ni na trenutno stanje u Javnom RTV servisu BiH i stoga i ne treba da pokriju postojeći dug. Najvažnije pitanje jeste kako naći rješenje za prevazilaženje postojećeg stanja i kako pokriti dug od oko 6 miliona KM, nakon čega se može razgovarati o unapređenju rada Javnog RTV servisa BiH u narednih pet godina. Također, predložila je da Parlamentarna skupština BiH zatraži od menadžmenta Javnog RTV servisa BiH dodatni plan o tome kako, prije svega, riješiti pitanje duga, te da Upravni odbor razmotri poziciju i odogovornost menadžmenta BHRT-a za takvo stanje u ovoj kući. Nakon izlaganja, Milica Marković predložila je sljedeći

ZAKLJUČAK

1. "Zadužuje se Upravni odbor i menadžment RTVBiH da uradi prioritetni plan izmirenja dugovanja RTVBiH prema revizorskom izvještaju, te način njegove realizacije i o tome izvijesti Parlamentarnu skupštinu BiH.
2. Zadužuje se Upravni odbor RTVBiH da, nakon utvrđenog Izvještaja Tužilaštva BiH i SIPA-e o provedenoj istrazi u ovoj kući, razmotri poziciju i odgovornost menadžmenta RTVBiH za proizvedeno stanje te shodno tome preduzme adekvatne mjere u okviru svojih nadležnosti."

Nakon izlaganja Milice Marković korekciju citata (repliku) imao je Adem Ibrahimpašić.

- **Savo Erić** osvrnuo se na rad Komisije za finansije i budžet Predstavničkog doma u vezi s revizorskim izvještajima o poslovanju Javnog RTV servisa BiH i na zaključke ove komisije. U budžetu institucija BiH nisu planirana sredstva za sanaciju duga Javnog RTV servisa BiH, pa se ona ne mogu ni osigurati za tu namjenu, a osim toga u budućnosti se mora planirati digitalizacija i standardizacija RTV-a u skladu s evropskim principima o čemu se mora razgovarati i taj segment planirati za budžetsko finansiranje.
- **Dušanka Majkić** svoju diskusiju usmjerila je na Plan konsolidacije poslovanja BHRT-a, koji je sačinio menadžment Javnog RTV servisa BiH. Posebno je istakla problem 700 radnika nepostojećeg medija centra buduće korporacije koji predstavljaju potencijalni tehnološki višak, te probleme u organizaciji pripreme i realizacije programa iz centara Sarajevo, Mostar i Banja Luka, pri čemu se Sarajevo uvijek favorizira.

- **Husein Nanić** najprije je naglasio činjenicu da materijali o ovoj tački dnevnog reda imaju oko 250 stranica što ukazuje na konfuzno stanje u ovoj oblasti. Istakao je da je neophodno tražiti i ponuditi rješenja trenutnog stanja i pitanje budućnosti Javnog RTV servisa BiH a dobra osnova za to su zaključci komisija za finansije i budžet oba doma, Komisije za saobraćaj i komunikacije Predstavničkog doma, te Komisije za vanjsku i trgovinsku politiku, carine, saobraćaj i komunikacije Doma naroda. Naveo je da treba istrajati u traženju odgovornosti za trenutno stanje u Javnom RTV sistemu BiH.
- **Beriz Belkić** skrenuo je pažnju da je predmet rasprave dokument koji se odnosi na stanje i plan mjera konsolidacije koji je usaglašen između menadžmenta i Upravnog odbora Javnog RTV servisa BiH. U dokumentu su ponuđeni mogući modaliteti konsolidacije u trajanju od pet godina, pri čemu se od države očekuje da uloži 42 miliona KM za tehnološku obnovu kapaciteta i tehnološku obnovu prijenosne i emisione mreže. S tim u vezi predložio je da se Vijeće ministara BiH i Ministarstvo finansija i trezora BiH obavežu da pokušaju naći modalitete koji bi omogućili da se u sljedećih pet godina, putem kredita ili posebne stavke u budžetu institucija BiH, osiguraju tražena sredstava.
- **Ilija Filipović** je, s ciljem potpune primjene Zakona o javnom RTV sistemu BiH, predložio sljedeći

ZAKLJUČAK

1. "Parlamentarna skupština BiH neupitno se zalaže za zakonito i stabilno poslovanje javnih emitera i snažno podržava istinito, cjelovito, nepristrasno, pravedno i pravovremeno informiranje javnosti o svim događanjima u Bosni i Hercegovini i ostvarivanje prava informiranja javnosti, ravnopravno na jezicima sva tri konstitutivna naroda u Bosni i Hercegovini u duhu međunarodnih i evropskih propisa i standarda, kao i odredbi Ustava BiH.
 2. Parlamentarna skupština BiH smatra da je to bitan uslov ravnopravnosti naroda i građana Bosne i Hercegovine i da je to jedan od temelja opstanka, samoodrživosti i dugoročne stabilnosti zemlje.
 3. Parlamentarna skupština BiH obavezuje Vijeće ministara BiH da pokrene postupak osnivanja novog RTV kanala na hrvatskom jeziku, unutar Javnog RTV sistema BiH, na osnovu odredbi člana 9. stav 2. Zakona o Javnom radiotelevizijskom sistemu BiH.
 4. Zaključak objaviti u "Službenom glasniku BiH".
- **Adem Ibrahimpašić** također je istakao neophodnost potpune primjene Zakona o javnom RTV sistemu BiH, te je nakon izlaganja predložio sljedeći

ZAKLJUČAK

1. "U potpunosti provesti Zakon o javnom RTV sistemu BiH i Zakon RTV servisu. Za realizaciju ovog zaključka zadužiti Ministarstvo prometa i komunikacija BiH.
2. Zadužiti Vijeće ministara BiH da u narednih pet godina osigura iz budžeta institucija BiH 56 miliona KM za ulaganje u digitalizaciju prijenosne i produkcione mreže.
3. Povećati RTV taksu na minimalno 10 KM radi stabilizacije poslovanja i sanacije dugova."

- **Jerko Ivanković Lijanović** u okviru ove tačke dnevnog reda predložio je sljedeći

ZAKLJUČAK

1. "Obavezuje se vladajuća većina (šestorka) da u roku od 30 dana uputi u parlamentarnu proceduru izmjene i dopune Budžeta BiH u kojem će se osigurati 20.000.000 KM za finansijsku podršku Javnom RTV servisu BiH u 2008. godini.
2. Zadužuje se Upravni odbor Javnog RTV servisa da u roku od 30 dana dostavi program utroška predviđenih sredstava."

- **Momčilo Novaković** naglasio je nedostatke i propuste u izradi plana konsolidacije Javnog RTV servisa BiH, uz konstataciju da je traženje sredstava iz budžeta institucija BiH i povećanje RTV takse posljednja mjera koju treba primijeniti. U okviru ove tačke dnevnog reda Momčilo Novaković predložio je sljedeći

ZAKLJUČAK

1. "Parlamentarna skupština BiH vraća dokument "Stanje i plan konsolidacije BHRT-a" na doradu predlagачu radi dopune s jasnim mjerama za konsolidaciju stanja.
2. Parlamentarna skupština BiH traži od Vijeća ministara BiH da se uključi u rješavanje ovog problema te da da jasan stav o mjerama za konsolidaciju stanja."

- **Božo Rajić** osvrnuo se na činjenicu da Zakon o javnom RTV sistemu BiH nije proveden i posljedice koje su proizašle iz te činjenice. Istakao je neprihvatljivim kako neslaganje između Upravnog odbora i menadžmenta Javnog RTV servisa BiH i sve ono što je proizašlo iz tog neslaganja, tako i neravnomjernu profesionalu i nacionalnu zastupljenost konstitutivnih naroda u strukturi zaposlenih. Na kraju je iznio svoje stavove bez namjere da na bilo koji način utiče na uređivačku politiku Javnog RTV servisa BiH o načinu rada i izvještavanja novinara, naglašavajući potrebu da se poštuje kodeks profesije.

- **Salko Sokolović** istakao je da je reforma Javnog RTV sistema jedan od tri uslova za potpisivanje Sporazuma o stabilizaciji i pridruživanju Bosne i Hercegovine Evropskoj uniji. Govoreći o neprovođenju Zakona o javnom RTV sistemu BiH, naveo je i izostanak formiranja korporacije Javnog RTV sistema kao veoma bitnog četvrtog subjekta u cjelokupnom sistemu.

- **Jozo Križanović** u uvodnom dijelu izlaganja konstatirao je da se na osnovu dostavljenih materijala može zaključiti da u poslovanju Javnog RTV servisa BiH postoji jako puno problema koji su rezultat nepoštivanja ili neprovođenja Zakona o Javnom RTV sistemu BiH, te nepoštivanja pravila dobrog poslovanja. Posebno se osvrnuo na pitanje uloge Parlamentarne skupštine BiH u pogledu Javnog RTV servisa BiH. Nakon izlaganja, Jozo Križanović predložio je sljedeće

ZAKLJUČKE

1. "Obavezuje se Vijeće ministara BiH da, u saradnji s Upravnim odborom RTV servisa BiH, razmotri eventualna zakonska ograničenja i tehničke nedostatke za kvalitetniji i uspješniji rad RTV servisa BiH i predloži Parlamentarnoj skupštini BiH konkretan plan mjera do kraja maja 2008. godine, te da se odmah pristupi konstituiranju korporacije kao nužnom i integrirajućem faktoru RTV servisa.

2. Parlamentarna skupština BiH podržava poziv novinara Bosne i Hercegovine, te se ograđuje i osuđuje nasilničko ponašanje člana Parlamentarne skupštine BiH na novinara FTV-a i traži od Kolegija Predstavničkog doma Parlamentarne skupštine BiH i njenih nadležnih tijela da razmotre ovaj slučaj i primijene odgovarajuće mjere u skladu sa zakonom, poslovnikom i drugim aktima Predstavničkog doma Parlamentarne skupštine BiH, te o tome izvijesti Predstavnički dom do kraja maja 2008. godine.
 3. U vezi sa sve učestalijim uskraćivanjem informacija, prijetnjama i fizičkim napadima na novinare u Bosni i Hercegovini, Parlamentarna skupština BiH podržava pozive novinara Bosne i Hercegovine članovima Parlamentarne skupštine BiH i najoštrije osuđuje takva ponašanja pojedinaca i institucija i odlučno će učiniti sve iz svoje nadležnosti da osigura punu slobodu djelovanja medija kao važnog faktora i preduslova za objektivno i slobodno informiranje građana kao osnovnog uslova za demokratizaciju bosanskohercegovačkog društva."
- **Mehmed Suljkanović** istakao je da je nedopustivo da je prošlo više od dvije godine od usvajanja Zakona o javnom RTV sistemu BiH a da pri tome korporacija, kao četvrti subjekat u sistemu javnog emitiranja, još nije formirana, što je, po njemu, glavni uzrok svih problema u kojima se nalazi Javni RTV servis BiH.

Nakon izlaganja Mehmeda Suljkanovića, korekciju citata (repliku) imali su: Branko Zrno na izlaganje Jozo Križanovića i njegovu konstataciju da se iz Parlamentarne skupštine BiH ljudi pozivaju na neplaćanje pretplate; Jozo Križanović koji je dao dodatno pojašnjenje na repliku Branka Zrne.

- **Mirko Okolić** u okviru ove tačke dnevnog reda predložio je sljedeći

ZAKLJUČAK

1. "Zadužuje se Komisija za saobraćaj i komunikacije oba doma da organizuju:
 - a) nepristrasnu anketu građana Bosne i Hercegovine, vodeći računa o jednakoj zastupljenosti sva tri konstitutivna naroda te o pravednoj zastupljenosti ostalih naroda (prilikom anketiranja) o gledanosti, uređivačkoj politici, kvalitetu programa, nacionalnoj strukturi zaposlenih BHRT-a;
 - b) stručnu – kvalitetnu analizu pokrivenosti signalom BHRT-a cjelokupne teritorije BiH.
 2. Dobivene rezultate iskoristiti za daljnje usmjeravanje rada BHRT-a."
- **Branko Dokić** iznio je mišljenje da je ključni problem za stanje u Javnom RTV servisu BiH odnos između BHRT-a i Federalne televizije, odnosno potraživanja koja BHRT ima prema Federalnoj televiziji. Nakon izlaganja, Branko Dokić predložio je sljedeći

ZAKLJUČAK

1. "Parlamentarna skupština BiH zalaže se za zakonito i stabilno poslovanje BHRT-a i snažno podržava istinito, potpuno, nepristrasno, pravedno i blagovremeno informiranje javnosti o svim događajima u Bosni i Hercegovini i ostvarivanje prava informiranja javnosti, ravnopravno na jezicima sva tri konstitutivna naroda u Bosni i Hercegovini u skladu s međunarodnim i evropskim propisima i standardima, kao i odredbama Ustava BiH.
2. Parlamentarna skupština BiH zadužuje Upravni odbor i rukovodstvo BHRT-a da iskoriste sve zakonske mogućnosti da naplate potraživanja od entitetskih emitera.
3. Parlamentarna skupština BiH zahtijeva da Upravni odbor i rukovodstvo BHRT-a racionaliziraju poslovanje i iskoriste sve unutrašnje rezerve koje mogu da dovedu do finansijske konsolidacije.

4. Parlamentarna skupština BiH poziva nadležne institucije u Bosni i Hercegovini da pomognu Javnom radiotelevizijskom sistemu BiH u procesu prelaska s analogne na digitalnu televiziju.

Nakon izlaganja Branka Dokića, korekciju citata (repliku) imali su: Šefik Džaferović, Mladen Ivanić koji je replicirao Šefiku Džaferoviću, Vinko Zorić, Jerko Ivanković Lijanović, te Ivo Miro Jović .

U nastavku sjednice Mladne Ivanić, u ime Zajedničkog kolegija oba doma Parlamentarne skupštine BiH, predložio je da se članovi Parlamentarne skupštine BiH dogovore o osnivanju grupa prijateljstva Parlamentarne skupštine BiH.

Milorad Živković kratko je prezentirao prijedlog Zajedničkog kolegija oba doma za formiranje i konstituiranje šest grupa prijateljstva Parlamentarne skupštine BiH, ističući da bi Dom naroda imao predsjedavajućeg u dvije grupe a Predstavnički dom u četiri. Nakon toga pročitao je prijedloge za predsjedavajuće i zamjenike predsjedavajućih u svih šest grupa prijateljstva.

U 14 sati Mladen Ivanić najavio je pauzu do 15,15 sati.

Sjednica je nastavljena u 15,30 sati.

U nastavku rasprave učestvovali su:

- **Alma Čolo** podsjetila je prisutne da su brojni materijali koji su predmet rasprave na sjednici dostavljeni na traženje Parlamentarne skupštine BiH. Govoreći o odnosu i odgovornosti Upravnog odbora i menadžmenta Javnog RTV servisa BiH, istakla je da, shodno Zakonu o javnom RTV sistemu BiH, Javni RTV servis BiH ima obavezu jednom godišnje dostaviti izvještaj Parlamentarnoj skupštini BiH, pri čemu nije navedeno da taj izvještaj treba da dostavi Upravni odbor ili menadžment, već Javni RTV servis BiH. U pogledu iznesenih konstatacija na sjednici da Upravni odbor treba pokrenuti pitanje odgovornosti menadžmenta, podsjetila je da su predmet rasprave revizorski izvještaji za 2005. i 2006. godinu, a da je aktuelni generalni direktor na ovoj poziciji 13 mjeseci, pa se u tom smislu ne može tražiti njegova odgovornost za navedeni period. Posebno je istakla aktivnosti koje je menadžment preduzeo u skladu s preporukama iz revizorskih izvještaja, te potrebu da Parlamentarna skupština BiH stvori odgovarajući zakonski okvir za normalno i zakonito funkcioniranje Javnog RTV servisa BiH a koji se odnosi na donošenje zakona o javnim preduzećima na nivou Bosne i Hercegovine.

Nakon izlaganja Alme Čolo, korekciju citata (repliku) imali su: Slavko Jovičić, Momčilo Novaković, Sadik Ahmetović, Dušanka Majkić, Alma Čolo, Ekrem Ajanović, Denis Bećirović, Drago Kalabić, Ilija Filipović, Remzija Kadrić, Azra Hadžiahmetović, Ivo Miro Jović, Jerko Ivanković Lijanović i Božo Rajić.

Poslovničku intervenciju imao je Momčilo Novaković.

- **Šemsudin Mehmedović** istakao je da je Aneksom IX. Ustava BiH utvrđeno da se na nivou Bosne i Hercegovine moraju formirati korporacije, pa u skladu s tom odredbom treba primijeniti i Zakon o javnom RTV sistemu BiH i formirati korporaciju kao četvrti pravni subjekat. Slijedeći opredjeljenost ka evropskom putu jedan od uslova za taj put jeste i upostava samoodrživog i funakcionalnog Javnog televizijskog sistema u Bosni i Hercegovini, pa je u tom pravcu neohodno da sve mjere preduzmu Parlamentarna skupština BiH, Vijeće ministara BiH i Upravni odbor Javnog RTV servisa BiH. Također, Šemsudin Mehmedović osvrnuo se i na način i obim naplate RTV takse na cijeloj teritoriji Bosne i Hercegovine.

Nakon izlaganja Šemsudina Mehmedovića, korekciju citata (repliku) imali su: Rudo Vidović, Vinko Zorić, Sadik Ahmetović, Bakir Izetbegović, Dušanka Majkić, Drago Kalabić i Šemsudin Mehmedović.

- **Slobodan Šaraba** obrazložio je dva pitanja i to zbog čega se programom BHRT-a ne može biti zadovoljan, te zašto ovu medijsku kuću i njen rad kao svoju ne doživljavaju građani Bosne i Hercegovine ili veliki broj građana Bosne i Hercegovine. Također, konstatirao je da su u izvještajima evidentna dva krupna problema koja se odnose na kvalifikacionu i nacionalnu strukturu zaposlenih u Javnom RTV servisu BiH.
- **Bakir Izetbegović** iznio je svoj stav o iznesenim tvrdnjama da je Sarajevo bošnjačka politička tvrđava, iznoseći činjenice protiv takvih tvrdnji, a posebno se osvrnuo i na pitanje i probleme u vezi s nacionalnom zastupljenšću zaposlenih. Nakon izlaganja, u ime Kluba SDA, predložio je sljedeće

ZAKLJUČKE

1. "Parlamentarna skupština BiH podržava Plan konsolidacije poslovanja BHRT-a, koji su predložili menadžment i Upravni odbor BHRT-a, i zadužuje Vijeće ministara BiH da u projekcijama budžeta u narednim godinama planira neophodna sredstva za finansiranje mjera sanacije i razvoja – digitalizacije BHRT-a.
2. Zadužuje se predsjedavajući Odbora Javnog servisa da, zajedno s Odborom, ubrza primjenu Zakona o javnom RTV sistemu i Zakona o javnom RTV servisu, kako bi se hitno formirala korporacija i uspostavio ekonomski održiv sistem javnog emitiranja u skladu s navedenim zakonima i zahtjevom Evropske komisije.
3. Parlamentarna skupština BiH traži od Odbora Javnog servisa da predloži program mjera za uspostavljanje izbalansirane nacionalne zastupljenosti rukovodećeg, uredničkog i novinarskog kadra u cijelom Javnom RTV sistemu.
4. Parlamentarna skupština BiH traži od Vijeća ministara BiH da nastavi plaćati zakup satelita za potrebe BHRT-a.

Nakon izlaganja Bakira Izetbegovića, korekciju citata (repliku) imali su Momčilo Novaković i Bakir Izetbegović.

- **Velimir Jukić** osvrnuo se na pitanje nacionalne strukture zaposlenih u Javnom RTV servisu BiH, prijedlog konsolidacije za prevazilaženje trenutnog stanja u Javnom RTV servisu BiH, naplatu takse, te izvršenje obaveze u pravcu stvaranja uslova za pokrivanje RTV signalom BHRT-a cijele teritorije Bosne i Hercegovine. Nakon izlaganja, Velimir Jukić predložio je sljedeći

ZAKLJUČAK

"Poziva se Vijeće ministara BiH da hitno pristupi izradi novog zakona o RTV sistemu i servisu u BiH."

- **Zlatko Lagumdžija je**, u vezi s ovom tačkom dnevnog reda, istakao pitanja neophodnosti modernizacije i digitalizacije RTVBiH, potrebu formiranja korporacije, te rješavanja statusa 700 radnika čija je sudbina neizvjesna. Nakon izlaganja, Zlatko Lagumdžija predložio je sljedeći

ZAKLJUČAK

"Parlamentarna skupština BiH daje punu podršku tehničko-tehnološkoj obnovi (digitalizaciji) RTV BiH i traži od Vijeća ministara BiH i Upravnog odbora da na osnovu prijedloga menadžmenta uputi

Parlamentarnoj skupštini BiH elaborat koji će biti osnova za izdvajanje države u skladu s evropskim standardima i vremenskom dinamikom."

Nakon izlaganja Zlatka Lagumdžije, korekciju citata (repliku) imali su: Ivo Miro Jović, Božo Rajić, Dušanka Majkić, Velimir Jukić, Branko Zrno, Zlatko Lagumdžija i Niko Loznačić.

- **Denis Bećirović** posebno je istakao činjenicu da je parlamentarna većina u Predstavničkom domu usvojila program rada Vijeća ministara BiH koji je u svom ekspozu prezentirao predsjedavajući Vijeća ministara BiH u kojem je kao obaveza utvrđena i reforma sistema javnog emitiranja, te formiranje korporacije javnih RTV servisa, odnosno ispunjavanje uslova iz Studije izvodljivosti u procesu priključenja Evropskoj uniji, na čijoj realizaciji Parlamentarna skupština BiH treba insistirati. Naglasio je i uslove rada u kojima rade novinari i u tehničko-tehnološkom i u sigurnosnom pogledu.

Nakon izlaganja Denisa Bećirovića, korekciju citata (repliku) imali su Drago Kalabić i Azra Alajbegović.

Momčilo Novaković je, u ime Kluba poslanika SDS-a, zatražio pauzu od 10 minuta, te je predložio predsjedavajućim domova da održe konsultacije s predsjednicima klubova poslanika i klubova naroda i utvrde način rada u nastavku sjednice.

Na tražnje Momčila Novakovića, predsjedavajući je dao pauzu od 10 minuta

U nastavku sjednice, u raspravi su učestvovali:

- **Martin Raguž** koji je iznio mišljenje da je smisao rasprave na sjednici trebalo da bude usmjeren na to koliko je bh. javni servis u funkciji izgradnje stabilnih institucija i promoviranja javnog mnijenja, koliko su mu društvo i država osigurali ambijent da može obavljati tu ulogu, i ako nije, šta bi trebali biti naredni koraci. S tim u vezi ni Parlamentarna skupština BiH ne može pobjeći od svoje odgovornosti, te da, s ciljem jačanja bh. javnog servisa, treba prihvatiti legitimne zahtjeve za korekciju zakona. Komentirajući zahtjeve za formiranje kanala na hrvatskom jeziku, istakao je da to nije zahtjev za odvojeni segregacijski kanal, već kanal na službenom jeziku u skladu sa Ustavom BiH.
- **Niko Lozančić** svoju diskusiju počeo je navođenjem najznačajnijih odredbi Proglasa evropske federacije novinara o vrijednosti Javnog servisa emitiranja, predloživši Parlamentarnoj skupštini BiH da podrži ovaj proglas i utvrdi ga kao vrhunsko načelo za Javni RTV sistem i sva tri javna servisa. Nakon izlaganja, Niko Lozančić podržao je zaključak koji je predložio predsjednik Kluba HDZ-a Velimir Jukić, te je u okviru ove tačke dnevnog reda predložio i sljedeći

ZAKLJUČAK

1. "Parlamentarna skupština BiH primila je k znanju informacije iz dokumenta "Stanje i plan konsolidacije poslovanja RTVBiH", te konstatira da je neophodno hitno donijeti potpuno novi zakonski okvir o Javnom RTV sistemu i emiterima u BiH.
2. Obavezuje se Ministarstvo prometa i komunikacija BiH i Vijeće ministara BiH da u roku od tri mjeseca u parlamentarnu proceduru dostave prijedlog potrebnih zakonskih rješenja."

Nakon izlaganja Nike Lozančića, korekciju citata (repliku) imali su: Mladen Ivanić, Zlatko Lagumdžija, Niko Lozančić, Sadik Ahmetović i Milorad Živković.

- **Zoran Koprivica** konstatirao je da Javni RTV servis BiH posluje s gubitkom, za razliku od takvih istih ili sličnih servisa u susjednim zemljama, što je zabrinjavajući podatak. Naglašavajući činjenicu da je sloboda medija neupitna, osvrnuo se na rad medija u pogledu načina plasiranja informacija, te potrebu potpune primjene Kodeksa o emitiranju RTV programa ("Službeni glasnik BiH", br. 20/08).
- **Drago Ljubičić** izdvojio je nekoliko segmenata iz izvještaja Ureda za reviziju institucija BiH, naglašavajući da nije ni po jednoj tački koja je bila predmet revizije uočio pozitivno mišljenje.

Nakon što je diskutirali svi prijavljeni za ovu tačku dnevnog reda, članovima Parlamentarne skupštine BiH obratili su se Nikola Deretić, predsjednik Upravnog odbora Javnog RTV servisa BiH i Mehmed Agović, generalni direktor BHRT-a.

Pošto je zaključio raspravu o ovoj tački dnevnog reda, Mladen Ivanić upoznao je prisutne da su se Zajednički kolegij oba doma i predsjedavajući klubova usaglasili da sve predložene zaključke razmotre Komisija za vanjsku i trgovinsku politiku, carine, saobraćaj i komunikacije Doma naroda i Komisija za saobraćaj i komunikacije Predstavničkog doma, te da na osnovu predloženih zaključaka za sjednice domova Parlamentarne skupštine BiH utvrde usaglašene prijedloge zaključaka.

Ad. 2. Informacija o stanju u DKP mreži Bosne i Hercegovine

U okviru ove tačke dnevnog reda Mladen Ivanić predložio je da se najprije čuje izlaganje ministra vanjskih poslova BiH, nakon čega bi se na osnovu broja prijavljenih za raspravu utvrdio način rada u nastavku sjednice.

Branko Dokić postavio je pitanje da li se uopće može raspravljati o ovoj tački dnevnog reda bez prisustva članova Predsjedništva BiH?!

Mladen Ivanić naglasio je da su članovi Predsjedništva BiH uredno pozvani na sjednicu. Podsjetio je da je na inicijativu poslanika Momčila Novakovića otvorena rasprava o stanju u DKP mreži Bosne i Hercegovine, a povod je bio zatvaranje određenih diplomatsko-konzularnih predstavništava i neka druga pitanja u DKP mreži. U uvodnom izlaganju istakao je da je Ministarstvo vanjskih poslova BiH dostavilo informaciju o kojoj su nadležne komisije obavile raspravu.

Niko Lozančić je u poslovničkoj intervenciji istakao da je ova tačka dnevnog reda iz domena vanjske politike koju vodi Predsjedništvo BiH, a ministar vanjskih poslova BiH samo provodi odluke Predsjedništva BiH. U skladu s tim, u znak protesta zbog neprisustva sjednici članova Predsjedništva BiH, istakao je da neće učestvovati u raspravi o ovoj tački dnevnog reda, te je napustio sjednicu.

U diskusiji o tome hoće li se bez prisustva članova Predsjedništva BiH obaviti rasprava o ovoj tački dnevnog reda učestvovali su:

- **Momčilo Novaković**, koji je iznio mišljenje da se na sjednici može voditi racionalna rasprava, te da ona ne znači vođenje vanjske politike već analizu stanja u DKP-e mreži;
- **Milorad Živković** koji je predložio da se o ovom pitanju ipak otvori rasprava jer Parlamentarna skupština BiH ima pravo da pita, daje sugestije i izražava svoje stavove o ovoj ozbiljnoj temi;
- **Ivo Miro Jović** osvrnuo se na sadržaj Informacije navodeći da ona uglavnom odslikava rad ministra vanjskih poslova BiH a ne rad DKP-a u pogledu njihovog funkcioniranja i rezultata rada;

- **Duška Majkić**, koja je, također, konstatirala da Informacija o stanju u DKP mreži BiH ne govori ništa o stvarnom stanju u DKP mreži, što nameće pitanje postojanja elemenata za raspravu na sjednici;
- **Mladen Ivanić**, koji je podsjetio da je na prijedlog Momčila Novakovića Predstavnički dom Parlamentarne skupštine BiH zatražio materijale, na osnovu kojih je ponudio raspravu;
- **Vinko Zorić** predložio je da se rasprava odgodi;
- **Husein Nanić** predložio je da se osiguraju dodatne informacije od članova Predsjedništva BiH, kako bi se zbog značaja teme stvorili normalni uslovi za rad po ovoj tački dnevnog reda, ističući da je dostavljena informacija nepotpuna, te da ne predstavlja čak ni informaciju Vijeća ministara BiH već samo ministra vanjskih poslova BiH;
- **Azra Hadžiahemović** istakla je da ako se zatraži dopuna postojeće informacije u tom slučaju se treba precizirati šta informacija treba da sadrži;
- **Martin Raguz**, koji je zatražio da se, ako se odgodi rasprava o ovoj tački dnevnog reda, precizira kada će ona biti održana;
- **Slavko Matić**, koji je postavio pitanje o postojanju uslova za otvaranje rasprave;
- **Ekrem Ajanović**, koji je podsjetio da je dnevni red usvojen, te da je prisustvo ministra vanjskih poslova BiH dovoljno za završetak rada po ovoj tački dnevnog reda.

Nakon konsultacija s članovima Zajedničkog kolegija oba doma Parlamentarne skupštine BiH, Mladen Ivanić iznio je prijedlog da se domovi izjasne o tome da li će rasprava biti nastavljena na osnovu postojećeg materijala i prisustva ministra vanjskih poslova BiH. Pozvao je delegate u Domu naroda da se izjasne o pitanju "Ko je za to da se nastavi raditi i večeras završi razgovor o ovoj temi?"

Rezultati glasanja bili su sljedeći:

Dom naroda	
"za"	1
"protiv"	12
"suzdržan"	0

Predsjedavajući je konstatirao da se, shodno rezultatima glasanja, rasprava neće voditi o ovoj tački dnevnog reda.

Milorad Živković predložio je da se, pošto se rasprava neće voditi, usvoje zaključci iz mišljenja Komisije za vanjske poslove Predstavničkog doma i Komisije za vanjsku i trgovinsku politiku, carine, saobraćaj i komunikacije Doma naroda, u kojima su date naznake šta treba dopuniti u dostavljenoj informaciji. S tim u vezi, predložio je da se do zakazivanja sljedeće sjednice informacija dopuni sa sljedećim podacima, i to :

- imenima i prezimenima ambasadora - da li su karijerni ili stranački kadar,
- državljanstvu i stručnoj spremi ambasadora,
- finansijskim aspektima svake pojedinačne ambasade,
- strategiji razvoja DKP-a,
- četverogodišnjem planu rada, te mjerama i aktivnostima za realizaciju plana.

O ovom prijedloga Milorada Živkovića, Mladen Ivanić otvorio je raspravu.

U raspravi su učestvovali: Momčilo Novaković, Denis Bećirović, Husein Nanić, Duška Majkić, Mladen Ivanić i Milorad Živković.

Nakon rasprave, Mladen Ivanić konstatirao je da su članovi Parlamentarne skupštine BiH saglasni s prijedlogom Milorada Živkovića.

Na kraju sjednice Mladen Ivanić podsjetio je prisutne da je članovima Parlamentarne skupštine BiH dostavljen prijedlog za konstituiranje grupa prijateljstva Parlamentarne skupštine BiH, nakon čega je istakao da, ako ima primjedbi, odluka o konstituiranju neće biti donesena.

Primjedbu su iznijeli Šefik Džaferović, koji je predložio da umjesto njega predsjedavajući Grupe prijateljstva V. bude Sead Jamakosmanović, a da on bude predsjedavajući Grupe prijateljstva VI. Milorad Živković podsjetio je da su sastavi grupa prijateljstva objavljeni u "Službenom glasniku BiH", o čemu su obaviještene i sve ambasade u Bosni i Hercegovini, pa bi se u tom slučaju cijeli postupak morao ponoviti.

Mladen Ivanić konstatirao je da grupe prijateljstva Parlamentarne skupštine BiH nisu konstituirane, nego da će svaka grupa posebno izvršiti izbor predsjedavajućeg.

Sjednica je završena u 19, 45 sati.

Sastavni dio ovog zapisnika je transkript 8. zajedničke sjednice oba doma Parlamentarne skupštine BiH.

Sekretar
Doma naroda
Marin Vukoja

Predsjedavajući
Doma naroda
dr. Mladen Ivanić